

Perquai che ti vivas be ina giada*

DA DAVID SPINNLER

■ **«Das ist der Moment» – chanta Campino. Die Toten Hosen. E lura – ina chanzun pli tard: «Sind’ne Laune der Natur».** Il Hosen-concert è unplugged en la citad gronda. Jau sco pli baud davant il radio. Sin maisa la gasetta gronda da la Germania, las letras dal titel: «Die Frau, die aus dem Himmel kam.» Quai è il num ch’ils Indians dal pievel Lakota han dà a la giuvna activista per il clima, a Greta Thunberg da la Svezia. Mahpiya Etahan, il chau dals Lakota, haja ditg: Ti es ina giuvna che sveglia il mund.

En Svizra fissi atgnamain er il mument. Betg pervi dad ina luna da la natiara, mabain pervi da la voluntad democratica dal pievel pudessan nus er avair ina dunna «ch’arriva giu da tschiel». La schef-fa dals verds che candidescha per il cussegl federal. Ma lura èsi sco sche la lingua dal radio fiss interrutta da maniera immediata. Politichers vegls e conservativs fan sesidas da fracziun e decidan ch’i na saja betg anc opportun da decider chausas che savessan forse eventualmain esser revoluziunarias. Era sch’il pievel avess forse gugent quai u ha perfin decidì uschia.

Pertge essan nus en Svizra talmain pseudo-raschunaivels? Raschunaivel nun è dentant betg il gist pled. Stinà u testard fiss forse pli exact. Campino in Svizzer? Greta ina Svizra? Betg pussaivel. Roger Federer savess forse pregiar e lura faschesan blers Svizzers quai ch’el di. Ma Federer n’ha betg temp, sto sa concentrar sin ils detagls da ses sport sin autischem nivel. Nua èn ils idols svizzers che san er ina giada star nà e dir quai ch’insatgi sto dir ina giada als auters? Nus stain uschè bain en noss pajais che nus pudessan senz’auter ans concentrar ed ans engaschar cun corp ed olma per gidar a schliar ils gronds problems da noss temp. «Ein letztes Lied» chanta Campino suenter duas uras: «Alles passiert, wie es passieren muss». A la fin èsi magari gist dad avair fiduzia en il gir dal mund. Ina spezia da fiduzia divina.

La Svizra avess dentant schon basegn. Forse il meglier dad ina spezia da pèr sco Greta e Campino. Ina che sveglia nus, ed in che chanta ils messadis da maniera che ans muventa en nossa profunditad.

***sviluprà 1 ad 1 durant in concert da «Die Toten Hosen» – live sin in dals radios publics da la Svizra.**

L’autur è gestiunari da la Biosfera Val Müstair.

